

摘藻堂四庫全書薈要

史部

欽定四庫全書薈要卷六千五百三十三 史部

元史卷一百五十四

明翰林學士亞中大夫知制誥兼修國史宋濂等修

列傳第四十一

洪福源

洪福源其先中國人唐遣才子八人往教高麗洪其一也子孫世貴於三韓名所居曰唐城父大宣以都領鎮麟州福源為神騎都領因家焉歲丙子金源契丹九萬

餘衆竄入高麗丁丑九月奪江東城池據之戊寅冬十二月太祖命哈齊濟扎拉將兵追討大宣迎降與哈齊濟等共擊之降其元帥趙忠壬午冬十月又遣扎古雅等十二人窺覘納款虛實還遇害辛卯秋九月太宗命將薩喇達討之福源率先附州縣之民與薩喇達併力攻未附者又與阿爾圖等進至王京高麗王暉乃遣其弟懷安公請降遂置王京及州縣達嚕噶齊七十二人以鎮之師還壬辰夏六月高麗復叛殺所置達嚕噶齊

悉驅國人入據江華島福源招集北界四十餘城遺民
以待秋八月太宗復遣薩喇達將兵來討福源率所部
合攻之至王京處仁城薩喇達中流矢卒其副特爾格
引兵還唯福源留屯癸巳冬十月高麗悉衆來攻西京
屠其民劫大宣以東福源遂盡以所招集北界之衆來
歸處於遼陽瀋陽之間帝嘉其忠甲午夏五月特賜金
符為管領歸附高麗軍民長官仍令招討本國未附人
民又降旨諭高麗之民有執王瞰及元構難之人來朝

者與洪福源同於東京居之優加恩禮擢用若大兵既
加拒者死降者生其降民令福源統之乙未帝命唐古
巴圖爾與福源進討攻拔龍岡咸從二縣鳳海洞三州
山城及慈州又拔金山歸信昌朔州己亥春二月入朝
賜以鎧甲弓矢及金織文段金銀器金鞍勒等乙巳定
宗命阿瑪噶將兵與福源共拔威州平虜城辛亥憲宗
即位改授虎符仍為前後歸附高麗軍民長官癸丑從
諸王雅勒呼攻禾山東州春州三角山楊根天龍等城

拔之甲寅與扎拉台合兵攻光州安城忠州玄鳳珍原
甲向玉果等城拔之戊午福源遣其子茶邱從扎拉台
軍會高麗族子王鯨入質陰欲併統本國歸順人民譖
福源于帝遂見殺年五十三後贈嘉議大夫瀋陽侯諡
忠憲子七人俊奇君祥最知名

俊奇小字茶邱福源第二子也幼從軍以驍勇受知世
祖嘗以小字呼之中統二年秋茶邱雪父冤世祖聞之
詔諭之曰汝父方加寵用誤結刑章故於已廢之中庸

沛維新之澤可就帶元降虎符襲父職管領歸附高麗
軍民總管至元六年高麗權臣林衍叛冬十一月詔以
其軍三千從國王特訥克討平之遷江華島所有臣民
復歸王京十二月帝命茶邱率兵往鳳州等處立屯田
總管府八年二月入朝賜鈔百緡林衍餘黨裴仲孫等
立高麗王植親屬承化侯為王引三別抄軍據珍島以
叛五月茶邱奉旨偕經略使實都進兵討之破其軍殺
承化侯其黨金通精率餘衆走耽羅帝遣侍衛親軍千

戶王岑與茶邱議征取之策茶邱表陳通精之黨多在
王京可使招之招而不從擊之未晚從之俄奉旨往羅
州道監造戰船且招降耽羅茶邱得通精之姪金永等
七人俾招之通精不從留金永餘盡殺之十年詔茶邱
與實都率兵渡海擊破耽羅獲通精殺之悉免其脅從
者高麗始平十一年又命監造戰船經營日本國事三
月授昭勇大將軍安撫使高麗軍民總管如故己卯命
茶邱提點高麗農事八月授東征右副都元帥與都元

帥呼敦等領舟師二萬渡海征日本拔對馬一岐宜蠻
等島十四年正月授鎮國上將軍東征都元帥鎮高麗
二月率蒙古高麗女直漢軍從丞相巴延北征叛臣珠
爾噶岱等四月至圖埒河猝與賊遇茶邱突陣無前巴
延以其勇聞賜白金五十兩金鞍勒弓矢十七年授龍
虎衛上將軍征東行省右丞十八年與右丞實都將舟
師四萬由高麗金州合浦以進時右丞范文虎等將兵
十萬由慶元定海等處渡海期至日本一岐平戶等島

合兵登岸兵未交秋八月風壞舟而還十九年十月命
茶邱於平灤黑塌兒監造戰船七百艘以圖後舉二十
一年十一月復授征東行省右丞二十三年命往江浙
等處遣漢人復業二十四年納延叛車駕親征賜以翎
根甲寶刀命率高麗女直漢軍扈從猝遇納延騎兵萬
餘時茶邱兵不滿三千衆有懼色茶邱夜令軍中多裂
裳帛為旗幟斷馬尾為旄掩映林木張設疑兵納顏兵
大驚以為官兵大至遂降帝聞之厚加旌賞凱還授遼

陽等處行尚書省右丞二十七年以疾辭叛王哈丹等竄入高麗侵撓其國西京距遼陽二千里皆騷動中書省特起茶邱鎮遼左帝遣實喇台博羅爾賜以金字圓符命茶邱以便宜行事二十八年以疾卒年四十八子四人長曰萬

君祥小字雙叔福源第五子也年十四隨兄茶邱見世祖于上京帝悅命劉秉忠相之秉忠曰是兒目視不凡後必以功名顯但當致力于學耳令選師儒誨之至元

三年籍高麗民三百人為兵令君祥統之從托噶圖烈
巴延等軍築萬壽山復從開通州運河帝親諭之曰爾
守志忠勤朕所知也帝嘗坐便殿閱江南海東輿地圖
欲召知者詢其險易左丞相巴延樞密副使哈達以君
祥應旨奏對詳明帝悅酌以巨觥顧謂巴延曰是兒遠
大器也六年林衍叛從特訥克征之八年戍河南九年
掠淮西破其大四城十年從元帥博囉罕襲淮東之陽
湖俘其男女牛馬十一年入朝帝命巴延伐宋朝議以

宋之兵力多聚兩淮間我欲渡江彼必移師拒守遂命右衛指揮使圖們岱率輕銳二萬攻淮安以牽制之君祥以蒙古漢軍都鎮撫從行後巴延既渡江帝命圖們岱還軍蕭縣時君祥奉使巴延軍中宋黃州制置使陳奕降其子知漣水軍巴延遣三十騎往招之因令君祥入奏帝曰卿可急還陳知府降即偕來也及與俱入朝宴勞甚厚從元帥博囉罕攻清河拔之海州安撫丁順約降博囉罕令君祥以聞時巴延方朝上京見君祥甚

喜遂從南伐巴延克淮安至揚州分兵攻淮西宋制置
夏貴遣牛都統以書抵巴延曰諺云殺人一萬自損三
千願勿廢國力攻奪邊城若行在歸附邊城焉往巴延
遣君祥以牛都統入見留三日還軍中仍傳旨諭巴延
曰事難遙度宜臨機審圖之巴延師次鎮江諜報有宋
洪都統者為都督府將巴延謂君祥曰汝同姓可往招
致也洪都統即欣然來見君祥因厚遇之師進次臨平
山距臨安五十里洪都統來報曰宋丞相陳宜中殿帥

張世傑皆已逃去惟三宮未行宜早定計以活生民巴
延遂令洪都統護宋三宮令君祥隨之宋降陞武略將
軍中衛親軍千戶十五年命僉江南民兵還陞明威將
軍中衛親軍副都指揮使十七年進昭勇大將軍十九
年授樞密院判官二十三年轉昭武大將軍同僉樞密
院事二十四年納顏叛從世祖親征每駐蹕君祥輒以
兵車外環為營衛布置嚴密帝嘉之凱還加輔國上將
軍類次車駕起居為東征錄二十八年授遼陽行省右

承行樞密院留復居舊職俄加集賢大學士依舊同僉
樞密院事議者欲自東南海口辛橋開河合灤河運糧
至上都奉旨與中書右丞阿里相其利害還極言不便
罷之復奉使高麗還改僉書樞密院事成宗即位詔裁
減久任官知樞密院安巴等奏君祥在樞密十六年最
為久者帝曰君祥始終一心可勿遷也大德二年詔使
高麗臺臣劾君祥以他事中道追回已而事罷三年奉
使江浙問問民疾苦使還居昌平之皇華山絕口不

論時事者五年大德九年擢司農俄拜中書右丞十年
春改浙江行省右丞秋改遼陽右丞請於朝宜新省治
增巡兵設儒學提舉官都鎮撫等員以興文化修武備
事未成會武宗即位徵為同知樞密院事進榮祿大夫
平章政事商議遼陽等處行中書省事改遼陽行省平
章政事俄改商議行省事至大二年卒子邁奉訓大夫
同知開元總管府事

萬小字重喜至元十三年入宿衛十八年襲職為懷遠

大將軍安撫使高麗軍民總管仍佩父茶邱所佩虎符
二十四年納顏叛率兵征之六月至薩里圖嚕之地同
都萬戶實喇持穆爾與納顏將鴻哈戰大敗之又從世
祖與塔布台戰又敗之是月至納顏之地奉旨留蒙古
女直漢軍鎮哈喇河復選精騎扈駕至實喇鄂爾多從
御史大夫伊蘇特穆爾討納顏七月至托穆爾圖與金
嘉努戰敗之追至孟克山納古爾江等處平金嘉努塔
布台等九月師還哈坦巴喇噶齊再叛十月重喜從諸

王阿雅噶齊平章達春萬戶實喇特穆爾征之十二月
次瑪古布拉克時諸王托歡監司托台以兵四千餘人
與其黨戰稍却重喜率騎兵援之冒鋒陷陣大破其衆
又從諸王奈曼阿雅噶齊平章色徹肯與叛王兵戰于
烏珠站又戰于黑龍江又戰于塔瑪噶處皆敗之二十
五年重喜又從伊蘇特穆爾出師五月至特爾格與哈
坦多羅干戰獲功至蒙果勒徹爾又戰八月至果勒河
重喜率兵先涉與戰勝之十月又從伊蘇特穆爾往征

茂巴爾十二月與輝圖多羅干戰克之二十七年六月
賜白金五十兩甲一襲九月至察楚克與哈坦多羅干
戰二十八年二月從平章色徹肯至高麗青州五月與
哈丹戰八日又戰敗之六月班師授昭勇大將軍佩三
珠虎符職如故十月色徹肯以重喜入朝且以其功聞
帝嘉之賜玉帶一白金五十兩授龍虎衛上將軍遼陽
等處行中書省右丞二十九年仍佩元降虎符總管高
麗女直漢軍萬戶兼安撫使高麗軍民總管六月改資

德大夫遼陽等處行中書省右丞大德十年以其叔父
君祥代之十一年武宗即位重喜朝于上都七月復授
遼陽行省右丞至大二年謫漳州行至杭遇赦而止明
年卒子滋襲爵

鄭鼎

鄭鼎澤州陽城人幼孤能自立讀書曉大義不妄言笑
既長勇力過人尤善騎射初為澤潞遼沁千戶歲甲午
從塔海甘布征蜀攻二里散闕屢立戰功還屯秦中未

幾宋將余侍郎燒絕棧道以兵圍興元鼎率衆修復之
破宋兵解興元之圍乙巳遷陽城縣軍民長官庚戌從
憲宗征大理國自六盤山經臨洮下西蕃諸城抵雪山
山徑盤屈舍騎徒步嘗背負憲宗以行敵據扼險要鼎
奮身力戰敵敗北帝壯之賜馬三匹至金沙江波濤洶
湧帝臨水傍危石立馬觀之鼎諫曰此非聖躬所宜親
扶下馬帝嘉之俄圍大理晝夜急攻城陷禽其主大理
平師還命鼎居後道經吐蕃全軍而歸辛亥入朝帝問

以時務鼎數對詳明帝嘉納之賜名曰伊克巴圖已未
賜白金千兩從世祖南伐攻大勝關破之繼破臺山寨
禽其守者胡知縣乘勝獨進前陷泥淖遇伏兵突出葭
葦間鼎奮擊連殺三人餘衆遁去帝急召鼎還使者以
聞帝曰為將當慎重不可恃勇輕進遂分畀衛士三百
人以備不虞且戒之曰自今非奉朕命毋得輕與敵接
秋九月帝駐蹕江潯命諸將南渡先達彼岸者舉烽火
為應鼎首奪南岸衆軍畢渡進圖鄂州戰益力別攻興

國軍遇宋兵五千力戰破之擒其將桑太尉責以懦怯
不忠所事斬之中統元年以功遷平陽太原兩路萬戶
阿勒達爾琿塔哈之亂鼎分率本道兵討之二年詔鼎
統征西等軍戍雁門關隘遷河東南北兩路宣撫使三
年改授平陽太原宣慰使至元三年遷平陽路總管是
歲大旱鼎下車而雨平陽地狹人衆常乏食鼎乃導汾
水溉民田千餘頃開潞河鵬黃嶺道以來上黨之粟修
學校厲風俗建橫澗故橋以便行旅民德之七年改僉

書西蜀四川行尚書省事將兵巡東川過嘉定遇蜀兵

與戰江中擒其將李越悉獲戰船八年五月改軍前行

尚書省事十一年從伐宋十二年鎮黃州夏四月改授

淮西宣慰使十三年加昭毅大將軍賜白金五百兩十

四年改湖北道宣慰使移鎮鄂州夏五月斬黃二州叛

鼎將兵討之戰于樊口舟覆溺死年六十有三十七年

董文忠等奏鄭伊克巴圖遇害其叛人家屬物產宜悉

與其子諾海帝從之贈中書右丞諡忠毅後加贈宣忠

保節功臣平章政事杜國追封潞國公諡忠肅子制宜
制宜小字諾海性聰敏莊重有器局通習國語至元十
四年襲父職太原平陽萬戶仍戍鄂州時鄂闕守俾攝
府事十九年朝廷將征日本造樓船何家洲洲地狹衆
欲徙旁居民制宜不從改授寬地居民德之城中屢災
或言于制宜曰恐姦人乘間為變宜捕其疑似者痛治
之制宜曰吾但嚴守備而已柰何濫及無辜不答一人
災亦遂息有盜伏近郊晨暮剽劫流言將入城俄有數

男子自城外至顧盼異常制宜命吏縛入獄問之無驗
行省疑其非將釋之不從明日再出城東遇一人乘白
馬貌服殊異制宜叱下訊之乃與前數男子同為盜者
遂正其罪一郡帖然二十四年扈駕東征納顏請赴敵
自劾帝顧左右曰而父歿王事惟有一子毋使在行陣
制宜請愈力乃命從伊嚕勒諾延別為一軍以戰功授
懷遠大將軍樞密院判官明年車駕幸上都舊制樞府
官從行歲留一員司本院事漢人不得與至是以屬制

宜制宜遜辭帝曰汝豈漢人比耶竟留之二十八年遷
湖廣行省參知政事陞辭帝曰汝父死王事賞未汝及
近者約蘇穆爾伏誅籍沒其財產人畜汝可擇其佳者
取之制宜對曰彼以賊敗臣復取之寧無污乎帝賢其
所守賜白金五千兩未幾徵拜內臺侍御史安西舊有
牧地圉人恃勢冒奪民田十萬餘頃訟于有司積年不
能理制宜奉詔而往按圖籍以正之訟由是息三十年
除湖廣行樞密副使湖南地濶遠羣寇依險出沒昭賀

二州及廬陵境民常被害制宜率偏師徇二州道經廬陵永新獲首賊及其黨皆殺之茶鄉譚計龍者聚惡少年匿兵器為姦既捕獲其家納賂以緩獄事制宜悉以勞軍斬計龍于市自是湖以南無復盜賊元貞元年有制行樞密院添置副使一員與制宜連署制宜以員非常設先任者當罷俄入朝特授大都留守領少府監兼武衛親軍都指揮使知屯田事大德七年晉地大震平陽尤甚壓死者衆制宜承命存恤懼緩不及事晝夜倍

道兼行至則親入里巷撫瘡殘給粟帛存者賴之成宗
素知其名眷遇殊厚每侍宴輒不敢飲終日無惰容帝
察其忠勤屢賜內醢輒持以奉母帝聞之特封其母蘇
氏為潞國太夫人十年制宜以疾終年四十有七贈推
忠贊治功臣銀青榮祿大夫平章政事追封澤國公諡
忠宣子阿爾斯蘭嗣

李進

李進保定曲陽人幼隸軍籍初從萬戶張柔屯杞之三

又口時荆山之西九十里曰龍岡者宋境也歲庚戌春
張柔引兵築堡岡上會淮水汎漲宋以舟師卒至主帥
察罕率軍逆戰進以兵十五人載一舟轉鬪十餘里奪
一巨艦遂以功陞百戶戊午憲宗西征丞相史天澤時
為河南經略大使選諸道兵之驍勇者從遂命進為總
把是年秋九月道由陳倉入興元度米倉關其地荒塞
不通進伐木開道七百餘里冬十一月至定遠七星關
其關上下皆築連堡宋以五百人守之巴渠江水環堡

東流天澤命進往關下說降之不從進潛視間道歸白
天澤曰彼可取也是夜二鼓天澤遣進率勇士七十人
掩其不備攻之脫門樞而入者二十人守門者覺拔刀
拒之進被傷不以為病懸門俄閉諸軍不得入進與二
十人力戰殺傷三十人宋兵走上堡進乃毀懸門納諸
軍追至上堡殺傷益衆宋兵不能敵棄走夜將旦進遂
得其堡守之關路始通諸軍盡度進以功受上賞己未
春二月天澤兵至行在所圍合州釣魚山寨夏五月宋

由嘉陵江以舟師來援始大戰三槽山西六月戰山之東有功秋七月宋兵戰船三百餘泊黑石峽東以輕舟五十為前鋒北軍之船七十餘泊峽西相距一里許帝立馬東山擁兵二萬夾江而陣天澤乃號令於衆曰聽吾鼓視吾旗無少怠也頃之聞鼓聲視其旗東指諸軍遂鼓譟而入兵一交宋前鋒潰走戰艦繼亂順流縱擊死者不可勝計帝指顧謂諸將曰白旗下服紅半臂突而前者誰也天澤以進對賞錦衣名馬八月又戰浮圖

關前後凡五戰皆以功受上賞世祖即位入為侍衛親
軍中統二年宣授總把賜銀符三年從征李璫有功至
元八年領兵赴襄陽十二年從略地湖北湖南宋平以
兵馬使分兵屯鄂州十三年領軍三千屯田河西中興
府十四年加武略將軍陞千戶十五年移屯六盤山加
武毅將軍賜金符十七年陞明威將軍管軍總管十九
年賜虎符復進懷遠大將軍命屯田西域巴實伯里二
十三年秋海都及都勒幹等領軍至洪水山進與力戰

衆寡不敵軍潰進被擒至綽巴爾遁還至和州收潰兵
三百餘人且戰且行還至京師賞金織紋衣二襲鈔一
千五百貫二十五年授蒙古侍衛親軍都指揮使司僉
事明年改授左翼屯田萬戶元貞元年春卒子雲襲授
武德將軍左翼屯田萬戶佩虎符皇慶二年加宣武將
軍延祐六年仁宗念其父進嘗北征被掠特賜雲中統
鈔五百錠以恤之泰定元年春以疾辭子多爾濟襲

舒穆魯安扎

布拉附

舒穆魯安扎契丹人世居太原父大嘉努率漢軍五百
歸太祖歲戊午安扎代領其軍從都元帥耨埒攻成都
時宋兵聚於虛泉安扎以所部兵與戰大敗之殺其將
韓都統又從都元帥阿敦攻瀘州安扎以戰艦七十艘
至馬湖江宋軍先以五百艘控扼江渡安扎擊敗之時
宋兵於沿江撤橋據守安扎相地形造浮橋師至無留
行宋欲撓其役兵出輒敗自馬湖以達合江涪江清江
凡立浮橋二十餘所及四川平浮橋之功居多己未宋

以巨艦載甲士數萬屯清河浮橋相距七十日水暴漲
浮橋壞西岸軍多漂溺安扎軍東岸急撤浮橋聚舟岸
下士卒得不死又援出別部軍五百餘人先鋒博恰和
爾齊以聞憲宗遣使慰諭賞賜甚厚敘州守將橫截江
津軍不得渡安扎聚軍中牛皮作渾脫及皮船乘之與
戰破其軍奪其渡口為浮橋以濟師中統三年授河中
府船橋水手軍總管佩金符以立浮橋功也至元四年
從行省伊蘇忒爾攻瀘州安扎以水軍與宋將陳都統

張總制戰于馬湖江安扎身被二創戰愈力敗之六年
正月伊蘇忒爾領兵趨瀘州遣安扎以舟運其器械糧
食由水道進宋兵復扼馬湖江安扎擊敗之生獲四十
人奪其船五艘復以水軍一十運糧於眉簡二州軍中
賴之九年從征建都蠻歲餘不下安扎先登其城力戰
遂降之軍還道病卒行省承制以其子布拉代領其軍
布拉從攻嘉定以巨艦七十艘載勇士數千人據其上
流於府江紅崖灘造浮橋以渡十二年嘉定降宋將鮮

于都統率衆遁布拉追至大佛灘盡斃之行院汪田哥
攻取紫雲瀘敘等城布拉功最多及諸軍圍重慶布拉
先以戰艦三百艘列陣於觀灘絕其走路十三年領隨
翼軍五百人會招討伊勒哈豎柵於白水江岸以為備
布拉乘夜襲宋軍直抵重慶城下攻千斯門宋軍驚潰
溺死者衆生擒三十餘人獲其旗幟甲仗以獻宋涪州
守將率舟師來援布拉擊敗之於廣陽埧生獲六十餘
人奪其船十艘十四年從攻瀘州布拉勒所部兵攻神

臂門蟻附以登斬首五十級明日復戰破之十五年復
攻重慶太平門布拉先登殺其守陴卒數十人宋都統
趙安以城降總管黃亮乘舟遁布拉追擒之及其兵士
五十人奪戰艦五十艘十六年命襲父職為懷遠大將
軍船橋軍馬總管更賜金虎符兼夔路守鎮副萬戶十
八年大小盤諸峒蠻叛命領諸翼蒙古漢軍三千餘人
戍施州既而蠻酋向貴誓用等降其餘峒蠻之未服者
悉平遂以為保寧等處萬戶

伊奇哩

伊奇哩女直人也大父實巴衮額布根登金進士第金
亡歸太宗伊奇哩幼穎悟能記誦長以孝友聞事世祖
潛邸得備宿衛中統初命叅議陝西行樞密院事以商
挺佐之比行入奏曰關陝要地軍務非輕阿爾圖敖拉
國之元臣陛下方委任之伏慮臨時議論不協必誤大
計儻有異同臣請得以上聞帝可其奏賜宴而遣之未
幾改行省斷事官復入宿衛李璫平朝議選宿衛之士

監漢軍伊奇哩佩虎符監軍於毗陽至元七年命為監戰以所領諸軍圍襄陽築一字堡以張軍勢一時名將索多劉國傑李庭等皆隸麾下攻樊城率其軍先登破之所受賞賜悉分將士十一年從丞相巴延次郢州將數騎而出與宋兵遇有部卒墮馬為其所得伊奇哩單騎橫戈直入其軍取之以還因殺獲四人時糧儲不繼諸將以為憂伊奇哩乃西攻江陵龍灣堡取其粟萬石衆賴以濟元兵東下宋將夏貴迎戰於陽邏汭巴延未

至衆欲少俟之伊奇哩曰兵貴神速機不可失宜及其未定而擊之遂直前衝貴軍獲戰船百餘貴敗走巴延上其功加定遠大將軍十二年攻常州伊奇哩造雲梯繩橋以登遂克之奉省檄徇安吉諸州皆下十三年宋降巴延命伊奇哩監守其宮號令嚴肅秋毫無犯入朝錄功遷昭勇大將軍未幾拜鎮國上將軍浙東宣慰使鎮守紹興十九年卒年四十二子齊拉衮襲為萬戶累遷江東廉訪使托克托淮東宣慰使

鄭溫

鄭溫真定靈壽人初從中書鈞祜祿納罕南征有功為
哈必齊千戶從丞相史天澤為新軍萬戶鎮撫憲宗征
西川溫四月不解甲天澤以溫見言其功帝曰朕所親
見也賜名伊克巴圖賞以鞍勒還至閬州奉旨分軍守
邏青居釣魚等山天澤命溫統四千人警邏釣魚山中
統元年佩金虎符為總管三年李璫叛詔溫以軍還討
至濟南大軍圍其城賊將楊巴圖等乘夜破營溫力戰

至黎明賊退諸王哈必齊丞相史天澤厚賞之七月城破命溫率兵三千往定益都以功復受上賞命為侍衛親軍總管至元六年進懷遠大將軍右衛副都指揮使九年詔溫統蒙古漢人女直高麗諸部軍萬人渡海征耽羅平之十二年陞右衛親軍都指揮使率三衛軍萬人從攻岳州江州沙市潭州皆有功平章阿爾哈雅賞銀十錠十四年入朝遷昭勇大將軍樞密院判官十八年改輔國上將軍江淮行省叅知政事杭民飢出米二


十萬石糴之俄賜以常州官田三十頃二十二年召還
二十三年陞江浙左丞命以新附漢軍萬五千於淮安
雲山泉塘立屯田二十八年卒年八十一子欽利用監
丞釭權茶都運使銓右衛親軍千戶鑄袁州路判官

元史卷一百五十四

元史卷一百五十四考證

洪福源傳降其元帥趙忠 案高麗傳趙忠作趙沖

李進傳己未春二月天澤兵至行在所圍合州釣魚山
寨 案史天澤傳載兵圍合州釣魚山寨係己未夏
事與此己未春互異



欽定四庫全書薈要卷六千五百三十四 史部

元史卷一百五十五

明翰林學士亞中大夫知制誥兼修國史宋濂等修

列傳第四十二

汪世顯

德臣

良臣

惟正

汪世顯字仲明鞏昌鹽州人系出翁觀族仕金屢立戰功官至鎮遠軍節度使鞏昌便宜總帥金平郡縣望風款附世顯獨城守及皇子奎騰駐兵城下始率衆降皇

子曰吾征四方所至皆下汝獨固守何也對曰臣不敢
背主失節耳又問曰金亡已久汝不降果誰為耶對曰
大軍迭至莫知適從惟殿下神武不殺竊意必能保全
闔城軍民是以降也皇子大悅承制錫世顯章服官從
其舊即從南征斷嘉陵擣大安田楊諸蠻結陣迎敵世
顯以輕騎馳撓之宋曹將軍潛兵相為犄角世顯單騎
突之殺數十人黎明大將四合殺其主將入武信遂進
逼資普軍葭萌宋將依山為柵世顯以數騎往奪之乘

勝定資州略嘉定峨眉進次開州時方泥潦由間道攀緣以達宋軍屯萬州南岸世顯即水北造船以疑之夜從上游鼓革舟襲破之宋師大擾追奔至夔峽過巫山與宋援軍遇斬首三千餘級明年師還攻重慶會大暑乃罷歸覲太宗錫金符易其名曰中山且厯數其功世顯拜謝曰此皆聖明福德所致臣何預焉辛丑蜀帥陳隆之貽書請戰聲言有衆百萬皇子集諸將議之咸謂隆之可生擒也世顯曰顧臨敵何如無庸誇辭為軍薄

成都隆之戰屢却堅壁不出其部曲田顯約夜降隆之
覺之世顯曰事急矣亟梯城入救顯得與從者七十餘
人出獲隆之斬之世顯復簡精銳五百人擣漢州州兵
三千出戰城閉盡沒三日大軍薄其城又三日克之癸
卯春皇子第功承制拜便宜總帥秦鞏等二十餘州事
皆聽裁決賜虎符錦衣玉帶世顯先已邁疾至是益劇
皇子遣醫絡繹往療竟不起年四十九中統三年論功
追封隴西公諡義武延祐七年加封隴右王子七人忠

臣鞏昌便宜副總帥次德臣次直臣鞏昌中路都總領
歿於王事次良臣次翰臣鄂囉兵馬都元帥佐臣鞏昌
左翼都總領歿於王事清臣四川行樞密院副使

德臣賜名田哥字舜輔年十四侍太子遊獵矢無虛發
襲爵鞏昌等二十四路便宜都總帥從征蜀將前軍出
忠涪所向克獲進攻運山率麾下先所乘馬中飛石死
步戰拔外城宋將余玠攻漢中德臣馳赴之玠聞遁去
憲宗素聞其名及入覲所陳悉嘉納賜印符命城沔州

沔據嘉陵要路德臣繕治室廬部署官屬數日而集進
攻嘉定敵潛軍夜出德臣迎戰殺百人還至左綿雲頂
宋軍乘夜斫營覺之殺千人生擒百人進次隆慶宋軍
仍夜出與力戰盡殺之及馬漕溝遇伏兵與戰獲其統
制羅廷鶚又詔德臣城益昌諸戍皆聽節制世祖以皇
弟有事西南德臣入見乞免益昌賦稅及徭役漕糧屯
田為長久計並從之即命置行部於鞏立漕司於沔通
販鬻給饋餉奏乞以兄忠臣攝府事使已得專事益昌

益昌為蜀喉襟蜀人憚其威名諸郡環視莫敢出關甲寅春旱嘉陵漕舟水溢議者欲棄去德臣曰國家以蜀事托我有死而已奈何棄之盡殺所乘馬饗士襲嘉州得糧二千餘石雲頂呂遠將兵五千邀戰即陣擒之復得糧五千石既而魚關金牛水陸運偕至屯田麥亦登食用遂給夏獲宋提轄崔忠鄭再立縱令持檄諭苦竹守將南清以城降所俘城中民悉歸之東南戍卒數百有去志德臣揣知之給券縱去皆泣謝未幾山寨相繼

輸款宋將余晦遣都統甘閏以兵數萬城紫金山德臣
即選精兵銜枚夜進大破之閏僅以身免南清北觀其
下殺清妻子以叛蜀將焦遠領兵餉之德臣擊敗遠盡
獲所餉資糧冬蜀兵二萬復至又敗之獲糧百餘船魚
關至沔水迂回為渡百有八至是悉為橋梁戊午歲帝
親征次漢中德臣朝行在所初諸路軍成都猝為宋人
所圍德臣遣將赴之約曰先破敵者奏領此城圍遂解
詔候江南事定如約以城與之帝幸益昌駐北山謂德

臣曰來者言汝立利州之功今見汝身甚小而膽甚大不知敵曾薄汝城否德臣對曰賴陛下洪福未嘗一來帝曰彼憚卿威名耳賜金帶且俾立石紀功嘉陵白水交會勢洶急帝問船幾何可濟德臣曰大軍百萬非可淹延當別為方畧即命繫舟為梁一夕而成如履坦途帝顧謂諸王曰汪德臣言不虛發賜白金三十斤仍命刻石紀功苦竹既逆命至是攻之巖壁峭絕或請建天橋帝以問德臣曰臣知先登陷陣而已建橋非所知也

既而橋果無功乃率將士魚貫而進帝望見歎曰人言其膽勇豈虛譽耶宋守將趙仲納歎而楊立猶拒戰奮擊盡殺之德臣微疾帝勞之曰汝疾皆為我家飲以葡萄酒解玉帶賜之曰飲我酒服我帶疾其有瘳乎德臣泣謝宋龍州守將王德新遣所親願効順以郡民為祈奏如其請進攻長寧拔之斬守將王佐帝東下德臣為先鋒抵大獲山奪水門宋將楊大淵遣子乞活數萬人命引至帝前為請旦日大淵率衆降已而運山青居大

梁皆降攻釣魚山守臣王堅負險五月不下德臣單騎
至城下大呼曰王堅我來活汝一城軍民宜早降語未
既幾為飛石所中遂感疾帝遣使問勞俾還益昌奏曰
陛下尊為天子猶冒寒暑服勞于外臣待罪行伍死其
分也又遣丞相烏珍賜湯劑卒不起年三十有六中統
三年追封隴西公諡忠烈子六人長惟正次惟賢大司
徒惟和昭文館大學士惟明以質子為元帥惟能征西
都元帥惟純權便宜都總帥

良臣年十六七即從兄德臣出征每戰輒當前鋒以功擢裨帥兼便宜都府參議癸丑歲以德臣薦為鞏昌帥領所部兵屯田白水蜀邊塞不敢復出鈔略憲宗親征軍至六盤良臣還鞏昌供億所須事集而民不擾詔權便宜總帥府事良臣奏願與兄德臣効力定四川帝曰行軍餽餉所係不輕汝任其責自可立功良臣既奉命治橋梁平道路營舟車水陸無壅儲積充牣有旨賜黃金弓矢旌其能世祖即位阿勒達爾琿塔哈逆命劫六

盤府庫西垂騷動詔良臣討之兵至山丹置營按兵不戰者凡二月俄大舉至耀碑谷兩軍相當良臣慷慨誓諸將曰今日之事係國安危勝則富貴可保敗則身戮家亡苟能用命縱死行間不失忠孝之名衆聞踴躍而前會大風揚沙晝晦良臣手刃數十人賊勢沮衆軍乘勝擣之賊大潰獲阿勒達爾琿塔哈殺之西鄙輯寧捷聞賜金虎符權便宜都總帥中統二年和爾叛復討平之入覲賜燕屢稱其功良臣拜謝曰臣奉諸王成算何

功之有世祖嘉其能讓復賜金鞍甲胄弓矢轉同簽鞞
昌路便宜都總帥宋將咎萬壽帥戰船二百沿江而上
欲掩青居良臣伏甲數十艘其後身先逆戰萬壽敗走
伏發幾獲之三年授閬蓬廣安順慶等路征南都元帥
良臣以釣魚山險絕不可攻奏請就近地築城曰武勝
以扼其往來四年春良臣攻重慶命元帥康托克托先
驅與宋將朱禩孫兵交良臣塞其歸路引兵橫擊斷敵
兵為二敵敗走越城不得入盡殺之至元六年授東川

副統軍八年兄子惟正請於朝謂良臣久勞戎行乞身代之九年復授良臣昭勇大將軍鞏昌等二十四處便宜都總帥兼本路諸軍鄂羅總管明年召入帝曰成都被兵久須卿安集之授鎮國上將軍樞密副使西川行樞密院事蜀人安之十一年進攻嘉定咎萬壽堅守不出良臣度有伏兵大搜山谷果得而殺之進壘薄城萬壽悉軍出戰大破之伏尸蔽江萬壽乞降良臣奏免其死居民按堵良臣統兵順流而下紫雲瀘敘相繼欵附

還圍重慶十三年宋涪州安撫楊立帥兵救重慶者再
良臣皆敗走之宋安撫張玘遣將乘虛襲據瀘州良臣
還軍平之復攻重慶十五年春張玘遣衆鏖戰良臣奮
擊大破之身中四矢明日督戰益急玘所部趙安開門
納降玘潛遜良臣禁俘掠發粟賑饑民大悅四川悉平
捷聞世祖喜甚召良臣入覲授資善大夫中書左丞行
四川中書省事賜白貂裘良臣陳治蜀十五事世祖喜
納良臣至成都以蜀瘡痍之餘極意循撫行省罷改授

安西王相不赴十八年夏疾卒年五十一贈儀同三司
謚忠惠加贈推誠保德宣力功臣儀同三司陝西等處
行中書省平章政事柱國追封梁國公子七人惟勤雲
南諸路行省平章政事惟簡保寧萬戶惟某同知屯田
總管府事惟永征西都元帥惟恭階州同知惟仁人匠
總管達魯噶齊惟新漢軍千戶

惟正字公理幼穎悟藏書二萬卷喜從文士論議古今
治亂尤喜談兵時出游獵則勒從騎為攻守狀父卒于

軍皇姪壽王俾權襲父爵守青居山世祖即位遂真授
焉初憲宗遣瑄塔哈以騎兵二萬守六盤又遣奇爾岱
布哈守青居瑄塔哈叛奇爾岱布哈發兵為應惟正命
力士縛奇爾岱布哈殺之世祖嘉其功詔東川軍事悉
聽處分中統二年入朝賜甲冑寶鞍三年詔還鞏昌部
長輝圖叛民大擾惟正謂將吏曰輝圖今若獠犬方肆
狂齧苟一戰不利則城邑為墟當勝以不戰乃發兵踵
之賊欲戰不得休則撓之若是者兩月知其糧盡勢蹙

曰可矣與戰屢捷輝圖遣三十人來約降即遣其十人還俾輝圖自來因潛兵躡其後出其不意擒殺之至元七年宋人修合州詔立武勝軍以拒之惟正臨嘉陵江作柵扼其水道夜懸燈柵間編竹為籠中置火炬順地勢轉走照百步外以防不虞宋人知有備不敢近九年帥兵掠忠涪獲令簿各一破寨七擒守將六降戶千六百有奇捕虜五百會丞相巴延克襄陽議取宋惟正奏曰蜀未下者數城耳宜并力攻餘抗本根既拔此將焉

往願以本兵由嘉陵下夔峽與巴延會錢塘帝優詔答
曰四川事重舍卿誰託異日蜀平功豈巴延下邪未幾
兩川樞密院合兵圍重慶命益兵助之惟正奪其洪崖
門獲宋將何統制皇子安西王出鎮秦蜀召惟正還十
四年冬皇子北伐而藩王圖魯叛於六盤王相府命布
色台領兵進討惟正為副布色台不習兵師行無紀惟
正為正部曲肅行陳嚴斥候軍政一倚重焉進次平涼
簡鞏銳兵八千人與俱至六盤圖魯先據西山惟正分

安西兵為左右翼鞏兵獨居中去圖嚕一里許皆下馬
手弓圖嚕遣百騎突陳惟正令引滿毋發將及又命曰
視必中而發於是矢下如雨突騎中者三之一餘盡馳
還圖嚕軍遂走惟正麾兵逐之三踰山至蕭河擒叛將
揚珠格爾復進兵圖嚕就擒安西王至惟正迎謁王厯
稱其功明日大燕賞以金尊杯貂裘王妃賜其母珠絡
帽衣且曰吾皇家兒婦也為汝母製衣汝母真福人也
詔惟正入朝世祖推玉食食之賜白金五千兩錦衣一

襲授金吾衛上將軍開城路宣慰使十七年遷龍虎衛

上將軍中書左丞行秦蜀中書省事賜玉帶以省治在

長安去蜀遠乃命惟正分省于蜀蜀土荐罹兵革民無

完居一聞馬嘶輒奔竄避匿惟正留意撫循人便安之

二十年進階資德大夫二十二年改授陝西行中書省

左丞入覲上都得腹疾還至華州卒年四十四諡貞肅

二子嗣昌武略將軍成都管軍副萬戶壽昌資德大夫

江南行御史臺中丞

史天澤格

史天澤字潤甫東直季子也身長八尺音如洪鐘善騎射勇力絕人從其兄天倪帥真定乙酉天倪遣護送其母歸北京既而天倪為武仙所害府僚王縉王守道追及天澤於燕曰變起倉卒部曲散走多在近郊公能迴轡南行不招自至矣天澤毅然曰兄弟之讐義所當復雖死不避況未必死邪即傾貲裝易甲仗南還行次滿城得士馬甚衆天澤攝行軍事遣監軍李伯祐詣國王

博囉言狀且乞濟師天澤時為帳前軍總領博囉承制
命紹兄職為都元帥俾實訥岱將蒙古軍三千人援之
合勢進攻盧奴仙驍將葛鐵槍者擁衆萬人來拒戰天
澤迎擊之身先士卒勇氣百倍賊退阻派河乘夜而遁
天澤追及之生擒葛鐵槍餘衆悉潰獲其兵甲輜重軍
威大振遂下中山略無極拔趙州進軍野頭會天澤兄
天安亦提兵來赴擊仙敗之仙奔雙門遂復真定未幾
宋大名總管彭義斌陰與仙合欲取真定天澤同實訥

岱扼諸贊皇仙不得進義斌勢感焚山自守天澤遣銳卒五十摧鋒而入自以鐵騎繼其後縛義斌斬之未幾仙復令謀者結死士於城中大厯寺為內應夜斬關而入據其城天澤引步卒數十踰城東出至藁城求援於董俊俊授以銳卒數百夜赴真定而實訥岱兵亦至捕叛者三百餘人仙從數騎走保西山抱犢砦實訥岱怒忿民之從賊驅萬餘人將殺之天澤曰彼皆吾民但為賊所脅耳殺之何罪力爭得釋乃繕城壁立樓櫓為不

可犯之計招集流散存恤困窮以抱犢諸砦仙之巢穴
不即剪覆終遺後患急攻下之仙乃遁去繼又取蟻尖
馬武等砦而相衛亦降己丑太宗即位議立三萬戶分
統漢兵天澤適入覲命為真定河間大名東平濟南五
路萬戶庚寅冬武仙復屯兵於衛天澤合諸軍圍之金
將完顏哈達以衆十萬來援戰不利諸將皆北天澤獨
以千人繞出其後敗一都尉軍與大軍合攻之仙逸去
遂復衛州壬辰春太宗由白坡渡河詔天澤以兵由孟

津會河南至則睿宗已破哈達軍于三峰山乃命略地
京東招降太康柘縣瓦岡睢州追斬金將完顏慶善努
於陽邑夏帝北還留睿宗總兵圍汴癸巳春金主突圍
而出令完顏拜牲自黃陵岡來襲新衛天澤率輕騎馳
赴之比至圍已合天澤奮戈突至城下呼守者曰汝等
勉力援兵且至復躍出其衆皆披靡遂與大軍夾擊之
拜牲等敗走蒲城天澤尾其後拜牲等兵尚八萬俘斬
殆盡金主以單舸東走歸德天澤追至歸德與諸軍會

新衛達嚕噶齊薩奇森布哈欲薄城背水而營天澤曰
此豈駐兵之地乎彼若來犯則進退失據矣不聽會天
澤以事之汴比還薩奇森布哈全軍皆沒金主遷蔡帝
命元帥布展率大軍圍之天澤當其北面結棧前渡汝
水血戰連日甲午春正月蔡破金主自經死天澤還真
定時政煩賦重貸錢於西北賈人以代輸累倍其息謂
之羊羔利民不能給天澤奏請官為償一本息而止繼
以歲饑假貸充貢賦積銀至一萬三千錠天澤傾家貲

率族屬官吏代償之又請以中戶為軍上下戶為民著
為定籍境內以寧金亡移軍伐宋乙未從皇子庫春攻
襄陽天澤先登拔之及攻襄陽宋兵以舟數千陳於峭
石灘天澤挾一舟載死士直前擣之覆溺者萬計丁酉
從宗王昆布哈圍光州天澤先破其外城繼攻子城又
破之師次復州宋兵以舟三千鎖湖面為柵天澤曰柵
破則復自潰親執桴鼓督勇士四十人攻其柵不踰時
柵破復人懼請降進攻壽春天澤獨當一面宋兵夜出

斫營天澤手擊殺數人麾下兵繼至悉驅其兵入淮水
死乘勝而南所向輒克壬子入覲憲宗賜衛州五城為
分邑世祖時在藩邸極知漢地不治河南尤甚請以天
澤為經畧使至則興利除害政無不舉誅郡邑長貳之
尤貪橫者二人境內大治阿勒達爾鈎較諸路財賦鍛
練羅織無所不至天澤以勲舊獨見優容天澤曰我為
經畧使今不我責而罪餘人我何安乎由是得釋者甚
衆戊午秋從憲宗伐宋由西蜀以入己未夏駐合州之

釣魚山軍中大疫咸議班師宋將呂文德以艤艦千餘
泝嘉陵江而上北軍迎戰不利帝命天澤禦之乃分軍
為兩翼跨江注射親率舟師順流縱擊三戰三捷奪其
戰艦百餘艘追至重慶而還中統元年世祖即位首召
天澤問以治國安民之道即具疏以對大略謂朝廷當
先立省部以正紀綱設監司以督諸路需恩澤以安反
側退貪殘以任賢能頒奉秩以養廉禁賄賂以防奸庶
能上下丕應內外休息帝嘉納之繼命往鄂渚撤江上

軍還授河南等路宣撫使俄兼江淮諸翼軍馬經略使
二年夏五月拜中書右丞相天澤既秉政凡前所言治
國安民之術無不次第舉行又定省規十條以正庶務
憲宗初年括戶餘百萬至是諸色占役者大半天澤悉
奏罷之秋九月扈從世祖親征額呼布格次實默圖之
地詔丞相實津將右軍天澤將左軍合勢蹙之額呼布
格敗走三年春李璫陰結宋人以益都叛遂據濟南詔
親王哈必齊總兵討之兇勢甚盛繼命天澤往天澤聞

壇入濟南笑曰豕突入笠無能為也至則進說於哈必齊曰壇多譎而兵精不宜力角當以歲月斃之乃深溝高壘絕其奔軼凡四月城中食盡軍潰出降生擒壇斬于軍門誅同惡者數十人餘悉縱歸明日引軍東行未至益都城中人已開門迎降初天澤將行帝臨軒授詔責以專征俾諸將皆聽節度天澤未嘗以詔示人及還帝慰勞之悉歸功於諸將其慎密謙退如此天澤在憲宗時嘗奏臣始攝先兄天倪軍民之職天倪有二子一

子管民政一子掌兵權臣復入叨奇遇一門之內處三要職分所當辭臣可退休矣帝曰卿奕世忠勤有勞於國一門三職何愧何嫌竟不許至是言者或謂李璫之變由諸侯權太重天澤遂奏兵民之權不可併於一門行之請自臣家始於是史氏子姪即日解兵符者十七人至元元年加光祿大夫右丞相如故三年皇太子燕王領中書省兼判樞密院事以天澤為輔國上將軍樞密副使四年復授光祿大夫改中書左丞相六年帝以

宋未附議攻襄陽詔天澤與駙馬呼喇珠往經畫之賜白金百錠楮幣萬緡至則相要害立城堡以絕其聲援為必取之計七年以疾還燕八年進開府儀同三司平章軍國重事仍勅右丞相安圖諭旨曰兩省院臺或一月一旬遇大事卿可商量小事不煩卿也十年春與平章阿珠等進攻樊城拔之襄陽降十一年詔天澤與丞相巴延總大軍自襄陽水陸並進天澤至郢州遇疾還襄陽帝遣侍臣賜以葡萄酒且諭之曰卿自朕祖宗以

來躬擐甲胄跋履山川宣力多矣又卿首事南伐異日
功成皆卿力也勿以小疾阻行為憂可且北歸善自調
護還至真定帝又遣其子杠與尚醫馳視賜以藥餌天
澤因附奏曰臣大限有終死不足惜但願天兵渡江惟
勿殺掠語不及它以十二年二月七日薨年七十四訃
聞帝震悼遣近臣賻以白金二千五百兩贈太尉謚忠
武後累贈太師進封鎮陽王立廟天澤平居未嘗自矜
其能及臨大節論大事毅然以天下之重自任年四十

始折節讀書尤熟於資治通鑑立論多出人意表拜相之日門庭悄然或勸以權自張天澤舉唐韋澳告周墀之語曰願相公無權爵祿刑賞天子之柄何以權為因以謝之言者慙服當金末名士流寓失所悉為治其生理而賓禮之後多致顯達破歸德釋李大節不殺而送至真定署為參謀衛為食邑命王昌齡治之舊人多不平而莫能間其知人之明用人之專如此是以出入將相五十年上不疑而下無怨人以此於郭子儀曹彬云

子格湖廣行省平章政事樟真定順天新軍萬戶棣衛
輝路轉運使杠湖廣行省右丞杞淮東道廉訪使梓同
知澧州楷同知南陽府彬中書左丞

格字晉明歲壬子憲宗賜天澤以衛城授格節度使憲
宗崩格北留謙州五年而歸為鄧州舊軍萬戶既又代
張弘範為亳州萬戶而以故所將鄧州舊軍授弘範從
攻襄陽襄陽下賜白金衣裘弓矢鞍馬衆軍渡江平章
阿珠將二十三萬戶居前每五萬戶擇一人為帥統之

格居其一格軍先渡為宋將程鵬飛所却格被三創喪其師二百尋復大戰中流矢鵬飛身亦被七創乃敗走其後樞密院奏格輕進請罪之帝念其功而薄其罪俾從平章阿爾哈雅攻潭州砲激柵木傷肩矢貫其手裏創先登拔之遂以軍民安撫留戍入覲加定遠大將軍賜以天澤所服玉帶從攻靜江衆以輶輜自蔽鑿城格所當砲礮蔽地車不可至乃伺隙率衆攀堞蟻附而上拔之徇廣西十三州廣東三州皆下靜江受兵之初溪

洞諸夷皆降雲南格遣使諭之來者五十州雲南爭之事聞詔聽格節度陞廣西宣撫使改鎮國上將軍廣南西道宣慰使宋亡陳宜中張世傑挾益王昞廣王昺據福州立益王傳檄嶺海欲復其地詐言夏貴已復瀕江州郡諸戍將以江路既絕不可北歸皆託計事還靜江格曰君等亦為虛聲所懼邪待貴踰嶺審不可北歸吾與諸軍取塗雲南而歸未為不可敢輒棄戍哉行省議棄廣東之肇慶德慶封州併兵戍梧州格曰棄地撤備

示敵以怯不可宜增兵戍之劇賊蘇仲集潰卒據鎮龍
山稱王劫掠於外耕植於內至秋畢獲聞大兵至則偽
出降官軍畏暑不敢深入橫象賔貴四州皆被其害格
築堡於其界守以土兵令官軍火其廬柵民踐其禾稼
仲窮蹙遂降益王餘衆破潯州斬李辰李福靜江北抵
泉永皆城守羅飛圍永凡七月不下判官潘澤民間道
來告急格分兵赴之殄其衆益王死衛王立趣廣州避
海中崖山遣曾淵子據雷州諭之降不聽進兵攻之淵

子犇碭洲世傑將兵數萬欲復取雷州戍將劉仲海擊走之後悉衆來圍城中絕糧士以草為食格漕欽廉高化諸州糧以給之世傑解圍去詔格戍雷州衛王死廣東西悉平張弘範請復將亳州軍乃還格鄧州舊軍拜參知政事行廣南西道宣慰使入覲拜資德大夫湖廣行中書省右丞移江西右丞尋復為湖廣右丞進平章政事卒年五十八子耀福建行省平章政事榮鄧州舊軍萬戶

欽定四庫全書



元史

卷一百一十五

元史卷一百五十五

元史卷一百五十五考證

汪世顯傳宋曹將軍潛兵相為犄角 案曹將軍即曹友聞通鑑載太宗七年先鋒汪世顯擣大安友聞救之指麾甫畢大軍數萬突至友聞迎戰敗之敵乃退明年九月與戰陽平關會大風雨軍盡沒元兵長驅入蜀是也此不書曹友聞名今附識

欽定四庫全書薈要卷六千五百三十五 吏部

元史卷一百五十六

明翰林學士亞中大夫知制誥兼修國史宋濂等修

列傳第四十三

董文炳

子士元

士選

董文炳字彥明俊之長子也父歿時年始十六率諸幼弟事母李夫人夫人有賢行治家嚴篤於教子文炳師侍其先生警敏善記誦自幼儼如成人歲乙未以父任

為豪城令同列皆父時人輕文炳年少吏亦不之憚文
炳明於聽斷以恩濟威未幾同列束手下之吏抱案求
署字不敢仰視里人亦大化服縣貧重以旱蝗而徵斂
日暴民不聊生文炳以私穀數千石與縣縣得以寬民
前令因軍興乏用稱貸於人而貸家取息歲倍縣以民
蠶麥償之文炳曰民困矣吾為令義不忍視也吾當為
代償乃以田廬若干畝計直與貸家復籍縣間田與貧
民為業使耕之於是流離漸還數年間民食以足朝廷

初料民令敢隱實者誅籍其家文炳使民聚口而居少
為戶數衆以為不可文炳曰為民獲罪吾所甘心民亦
有不樂為者文炳曰後當德我由是賦斂大減民皆富
完旁縣民有訟不得直者皆詣文炳求決文炳嘗上謁
大府旁縣人聚觀之曰吾亟聞董令董令顧亦人耳何
其明若神也時府索無厭文炳抑不予或讒之府府欲
中害之文炳曰吾終不能剝民求利也即棄官去世祖
在潛藩癸丑秋受命憲宗征南詔文炳率義士四十六

騎從行人馬道死殆盡及至吐番止兩人能從兩人者
挾文炳徒行躑躅道路取死馬肉續食日行不能二三
十里然志益厲期必至軍會使者過遇文炳還言其狀
時文炳弟文忠先從世祖軍世祖即命文忠解尚廐五
馬載糗糧迎文炳既至世祖壯其忠且閔其勞賜賚甚
厚有任使皆稱旨由是日親貴用事己未秋世祖伐宋
至淮西臺山寨命文炳往取之文炳馳至寨下諭以禍
福不應文炳脫胄呼曰吾所以不極兵威者欲活汝衆

也不速下今屠寨矣守者懼遂降九月師次陽羅堡宋兵築堡于岸陳船江中軍容甚盛文炳請於世祖曰長江天險宋所恃以為國勢必死守不奪其氣不可臣請嘗之即與敢死士數十百人當其前率弟文用文忠載艨艟鼓櫂疾趨叫呼畢奮鋒既交文炳麾衆趨岸搏之宋師大敗命文用輕舟報捷世祖方駐香爐峰因策馬下山問戰勝狀則扶鞍起立豎鞭仰指曰天也且命他師毋解甲明日將圍城既渡江會憲宗崩閏十一月班

師庚申世祖即位于上都是為中統元年命文炳宣慰

燕南諸道還奏曰人久弛縱一旦遽束以法不可危疑

者尚多宜赦天下與之更始世祖從之反側者遂安二

年擢山東東路宣撫使方就道會立侍衛親軍帝曰親

軍非文炳難任即遙授侍衛親軍都指揮使佩金虎符

三年李璫反濟南璫劇賊善用兵文炳會諸軍圍之璫

不得遁久之賊勢日蹙文炳曰窮寇可以計擒乃抵城

下呼璫將田都帥者曰反者璫耳餘來即吾人毋自取

死也田縋城降田瓊之愛將既降衆遂亂禽瓊以獻瓊
兵有浙漣兩軍二萬餘人勇而善戰主將怒其與賊配
諸軍使陰殺之文炳當殺二千人言于主將曰彼為瓊
所脅耳殺之恐乖天子仁聖之意向天子伐南詔或妄
殺人雖大將亦罪之是不宜殺也主將從之然他殺之
者已衆皆大悔瓊伏誅山東猶未靖乃以文炳為山東
東路經略使率親軍以行出金銀符五十有功者聽與
之閏九月文炳至益都留兵于外從數騎衣冠而入居

府不設警衛名瓊故將吏立之庭曰瓊狂賊誣誤汝等
瓊已誅死汝皆為王民天子至仁聖遣經略使撫汝當
相安毋懼經略使得便宜除擬將吏汝等勉取金銀符
經略使不敢格上命不予有功者所部大悅山東以安
至元二年帝懲李瓊之亂欲潛銷方鎮之橫以文炳代
史氏兩萬戶為鄧州光化行軍萬戶河南等路統軍副
使到官造戰艦五百艘習水戰預謀取宋方略凡阨塞
要害皆列柵築堡為備禦計帝嘗召文炳密謀欲大發

河北民丁文炳曰河南密邇宋境人習江淮地利宜使河北耕以供軍河南戰以闢地俟宋平則河北長隸兵籍河南削籍為民如是為便又將校素無俸給連年用兵至有身為大校出無馬乘者臣即所部千戶私役兵士四人百戶二人聽其雇役稍食其力帝皆從之始頒將校俸錢以秩為差七年改山東路統軍副使治沂州沂與宋接境鎮兵仰內郡餉運有詔和糴本部文炳命收州縣所移文衆諫以違詔文炳曰但止之乃遣使入

奏略曰敵人接壤知吾虛實一不可邊民供頓甚勞重
苦此役二不可困吾民以懼來者三不可帝大悟罷之
九年遷樞密院判官行院事於淮西築正陽兩城兩城
夾淮相望以綴襄陽及擣宋腹心十年拜參知政事夏
霖雨水漲宋淮西制置使夏貴帥舟師十萬來攻矢石
雨下文炳登城禦之一夕貴去復來飛矢貫文炳左臂
著脇文炳拔矢授左右發四十餘矢箠中矢盡顧左右
索矢又十餘發矢不繼力亦困不能張滿遂悶絕幾殆

明日水入外郭文炳麾士卒卻避貴乘之壓軍而陳文炳病創甚子士選請代戰文炳壯而遣之復自起束創手劍督戰士選以戈擊貴將仆不死獲之以獻貴遂去不敢復來是歲大舉兵伐宋丞相巴延自襄陽東下與宋人戰陽羅堡文炳以九月發正陽十一年正月會巴延于安慶安慶守將范文虎以城降文炳請于巴延曰大軍既疲於陽羅堡吾兵當前行巴延許之宋都督賈似道來禦師陳於蕪湖似道棄師走次當塗文炳復言

于巴延曰采石當江之南和州對峙不取必有後顧遂
進攻之降知州事王喜三月有詔以時向暑熱命巴延
軍駐建康文炳軍駐鎮江時揚州真州堅守不下常州
蘇州既降復叛張世傑孫虎臣約真揚兵誓死戰真揚
兵戰每敗不敢出世傑等陳大艦萬艘碇焦山下江中
勁卒居前文炳身犯之載士選別船弟之子士表請從
文炳顧曰吾弟僅汝一子脫吾與士選不返士元士秀
猶足殺敵吾不忍汝往也士表固請乃許文炳乘輪船

建大將旗鼓士選士表船翼之大呼突陳諸將繼進飛
矢蔽日戰酣短兵相接宋兵亦殊死戰聲震天地橫屍
委仗江水為之不流自寅至午宋師大敗世傑走文炳
追及于夾灘世傑收潰卒復戰又破之遂東走於海文
炳船小不可入海夜乃還俘甲士萬餘人悉縱不殺獲
戰船七百艘宋力自此遂窮十月諸軍分三道而進文
炳居左由江並海趨臨安先是江陰軍僉判李世脩欲
降不果文炳檄諭之世脩以城來附令權本軍安撫使

所過民不知兵凡獲生口悉縱遣之無敢匿者威信前
布皆望旗而服張瑄有衆數千負海為橫文炳命招討
使王世強及士選往降之士選單舸至瑄所諭以威德
瑄降得海舶五百十三年春正月次鹽官鹽官臨安劇
縣侯救至招之再返不下將佐請屠之文炳曰縣去臨
安不百里聲勢相及臨安約降已有成言吾輕殺一人
則害大計況屠一縣耶於是遣人入城諭意縣降遂會
巴延于臨安城北張世傑欲以其主逃之海文炳繞出

臨安城南戍浙江亭世傑計不行乃竊宋主弟吉王昱
廣王昺南走而宋主焘遂降巴延命文炳入城罷宋官
府散其諸軍封庫藏收禮樂器及諸圖籍文炳取宋主
諸璽符上於巴延巴延以宋主入覲有詔留事一委文
炳禁戢豪猾撫慰士女宋民不知易主時翰林學士李
槃奉詔招宋士至臨安文炳謂之曰國可滅史不可沒
宋十六主有天下三百餘年其太史所記具在史館宜
悉收以備典禮乃得宋史及諸注記五千餘冊歸之國

史院宋宗室福王與芮赴京師徧以重寶致諸貴人文炳獨卻不受及官錄與芮家具籍受寶者惟文炳無名巴延入朝奏曰臣等奉天威平宋宋既已平懷徠安集之功董文炳居多帝曰文炳吾舊臣忠勤朕所素知乃拜資德大夫中書左丞時張世傑奉吉王昱據台州而閩中亦為宋守勅文炳進兵所過禁士馬無敢履踐田麥曰在倉者吾既食之在野者汝又踐之新附之民何以續命是以南人感之不忍以兵相向次台州世傑遁

諸將先俘州民文炳下令曰台人首效順於我我不暇
有故世傑據之其民何罪敢有不縱所俘者以軍法論
得免者數萬口至温州温州未下令曰毋取子女毋掠
民有衆曰諾其守將火城中逃文炳亟命滅火追擒其
將數其殘民之罪斬以徇逾嶺閩人扶老來迎漳泉建
寧邵武諸郡皆送款來附凡得州若干縣若干戶口若
干閩人感文炳德最深廟而祀之十四年帝在上都適
北邊有警欲親將北伐正月急召文炳四月文炳至自

臨安比至帝日問來期及至即召入文炳拜稽首曰今南方已平臣無所效力請事北邊帝曰朕召卿意不在是也豎子盜兵朕自撫定山以南國之根本也盡以託卿卒有不虞便宜處置以聞中書省樞密院事無大小咨卿而行已勅主者卿其勉之文炳避謝不許因奏曰臣在臨安時阿勒巴奉詔檢括宋諸藏貨寶追索沒匿甚細人寔苦之宋人未洽吾德遽苦之以財恐非安懷之道即詔罷之又曰昔者泉州蒲壽庚以城降壽庚素

主市舶謂宜重其事權使為我扞海寇誘諸蠻臣服因
解所佩金虎符佩壽庚矣惟陛下恕其專擅之罪帝大
嘉之更賜金虎符燕勞畢即聽陛辭文炳求見皇太子
帝許之復勅太子曰董文炳所任甚重見畢即遣行既
見慰諭懇至文炳留士選宿衛即日就道凡在上都三
日至大都更日至中書樞密不署中書案平章政事阿
哈瑪特方恃寵用事生殺任情惟畏文炳奸狀為少斂
嘗執筆請曰相公官為左丞當署省案請至再四不肯

署皇太子聞之謂宮臣扎古納曰董文炳深慮非爾曹

所知後或私問其故文炳曰主上所付託者在根本之

重非文移之細且吾少徇則濟姦不徇則致讒讒行則

身危而深失付託本意吾是以預其大政而略其細務

也十五年夏文炳有疾奏請解機務詔曰大都暑熾非

病者宜卿可來此固當愈文炳至上都奏曰臣病不足

領機務西北高寒筋骸舒暢當復自愈請盡力北邊帝

曰卿固忠孝是不足行也樞密事重以卿僉書樞密院

事中書左丞如故文炳辭不許遂拜八月天壽節禮成
賜宴帝命坐文炳上坐諭宗室大臣曰董文炳功臣也
理當坐是每尚食上食輒輟賜文炳是夜文炳疾復作
勅賜御醫日來診視九月十三日疾篤洗沐而坐召文
忠等曰吾以先人死王事恨不為國死邊今至此命也
願董氏世有男能騎馬者勉力報國則吾死瞑目矣言
畢就枕卒帝聞悼痛良久命文忠護喪葬豪城令所過
有司以禮弔祭贈金紫光祿大夫平章政事諡忠獻子

士元士選

士元一名布哈字長卿文炳長子也自襁褓喪母祖母李氏愛之謂文炳曰俟兒能言即令讀書數歲從名儒受學及長善騎射憲宗征蜀士元年二十三從叔父文蔚率鄧州一軍西行師次釣魚山宋人堅壁拒守士元請代文蔚攻之以所部銳卒先登力戰良久以它軍不繼而還憲宗壯之賜以金帛中統初文蔚入典禁兵士元以世家子選供奉內班從車駕巡狩北方嘗預武定

山之役帝知其忠勤可任以事會文蔚病卒無子命士
元襲為千夫長出師南征襄漢分禁兵戍淮上士元在
軍中修勅武備號令肅然丞相巴延克江南宋兵保兩
淮未下士元數與戰拔淮安堡以功遷武節將軍從大
帥博囉干攻揚州駐師灣頭堡時方大暑博囉干病還
京師以行省阿里代領諸軍揚州守將姜才乘隙來攻
阿里素不習兵率輕騎數百出堡士元與別將哈喇圖
以百騎從之日已暮宋兵至者萬餘士元謂左右曰大

丈夫報國正在今日勿懼也方整陣欲戰阿里趣令左旋已乃遁去士元與哈喇圖以部兵赴敵死戰鼓譟震地泥淖馬不能馳乃棄馬步戰至四更敵衆始退及旦阿里來視戰地見士元臥泥中身被十七鎗甲裳盡赤肩舁至營而絕年四十二哈喇圖亦戰死江淮既平巴延入朝言於帝曰淮海之役所損者二將而已帝問其人以士元與哈喇圖對帝曰布哈健捷過人晝戰必能制敵夜戰而死甚可惜也至大元年贈鎮國上將軍僉

書樞密院事諡節愍後加贈推誠効節功臣資政大夫
中書左丞護軍追封趙郡公改諡忠愍

士選字舜卿文炳次子也幼從文炳居兵間晝治武事
夜讀書不輟文炳總師與宋兵戰金山士選戰甚力大
敗之追至海而還及降張瑄等丞相巴延臨陣觀之壯
其驍勇遣使問之始知為文炳子奏功佩金符為管軍
總管戰數有功宋降從文炳入宋宮取宋主降表及收
其文書圖籍靜重識大體秋毫無所取軍中稱之宋平

班師詔置侍衛親軍諸衛以士選為前衛指揮使號令
明正得士大夫心未幾以其職讓其弟士秀帝嘉其意
命士秀將前衛而以士選同僉行樞密院事於湖廣久
之召還宗王納顏叛帝親征召士選至行在所與李勞
山同將漢人諸軍以禦之納顏軍飛矢及乘輿前士選
等出步卒橫擊之其衆敗走緩急進退有禮帝甚善之
僧格事敗帝求直士用之以易其弊於是召士選論議
政事以中書左丞與平章政事徹爾往鎮浙西聽辟舉

僚屬至部察病民事悉以帝意除之民大悅有聚斂之
臣為奸利事發得罪且死詐言所遣舶商海外未至請
留以待之士選曰海商至則捕錄之不至則無如之何
不係斯人之存亡也苟此人幸存則無以謝天下遂竟
其罪浙多湖泊廣蓄泄以備水旱率為豪民占以種藝
水無所居積故數有水旱士選與徹爾力開復之成宗
即位僉行樞密院於建康未幾拜江西行省左丞贛州
盜劉六十偽立名號聚衆至萬餘朝廷遣兵討之主將

觀望退縮不肯戰守吏又因以擾良民賊勢益盛士選請自往衆欣然託之即日就道不求益兵但率掾史李霆鎮元明善二人持文書以去衆莫測其所為至贛境捕官吏害民者治之民相告語曰不知有官法如此進至興國縣去賊巢不百里命擇將校分兵守地待命察知激亂之人悉寘于法復誅奸民之為囊橐者於是民爭出請自效不數日遂擒賊魁散餘衆歸農軍中獲賊所為文書旁近郡縣富人姓名具在霆鎮明善請焚之

民心益安遣使以事平報于朝中書平章政事博果密
召其使謂之曰董公上功簿邪使者曰某且行左丞授
之言曰朝廷若以軍功為問但言鎮撫無狀得免罪幸
甚何功之可言因出其書但請黜賊吏數人而已不言
破賊事廷議深歎其知體而不伐拜江南行御史臺中
丞廉威素著不嚴而肅凜然有大臣風入僉樞密院事
俄拜御史中丞前中丞崔或久任風紀善幹旋以就事
功既卒博果密以平章軍國重事繼之方正持大體天

下望之而已多病遂以屬之士選風采明俊中外竦然
丞相諤勒哲用劉深言出師征八百媳婦國遠冒煙瘴
及至未戰士卒死者十已七八驅民轉粟餉軍谿谷之
間不容舟車必負擔以達一夫致粟八斗率數人佐之
凡數十日乃至由是民死者亦數十萬中外騷然而諤
勒哲說帝江南之地盡世祖所取陛下不興此役無功
可見於後世帝入其言用兵意甚堅故無敢諫者士選
率同列言之奏事殿中畢同列皆起士選乃獨言今劉

深出師以有用之民而取無用之地就令當取亦必遣使諭之諭之不從然後聚糧選兵視時而動豈得輕用一人妄言而致百萬生靈於死地帝色變士選猶明辨不止侍從皆為之戰慄帝曰事已成卿勿復言士選曰以言受罪臣之所當他日以不言罪臣臣死何益帝麾之起左右擁之以出未數月帝聞師敗績慨然曰董二哥之言驗矣吾愧之因賜上尊以旌直言始為罷兵誅劉深等世祖嘗呼文炳曰董大哥故帝以二哥呼士選

久之出為江浙行省右丞遷汴梁行省平章政事又遷陝西士選平生以忠義自許尤號廉介自門生部曲無敢持一毫獻者治家甚嚴而孝弟尤篤時言世家有禮法者必歸之董氏其禮敬賢士尤至在江西以屬掾元明善為賓友既又得吳澄而師之延虞汲於家塾以教其子諸老儒及西蜀遺士皆以書院之祿起之使以所學教授遷南行臺又招汲子集與俱後又得范梈等數人皆以文學大顯於時故世稱求賢薦士亦必以董氏

為首晚年好易澹然終其身每一之官必賣先業田廬
為行資故老而益貧子孫不異布衣之士仕者往往稱
廉吏云子守忠雲南行省參知政事守慤侍正府判官
守思知威州

張弘範

張弘範字仲疇柔第九子也善馬槊頗能為歌詩年二
十時兄順天路總管弘略上計壽陽行都留弘範攝府
事吏民服其明決蒙古軍所過肆暴弘範杖遣之入其

境無敢犯者中統初授御用局總管三年改行軍總管
從親王哈必齊討李璫於濟南柔戒之曰汝圍城勿避
險地汝無急心則兵必致死主者慮其險苟有來犯必
赴救可因以立功勉之弘範營城西璫出軍突諸將營
獨不向弘範弘範曰我營險地璫乃示弱於我必以奇
兵來襲謂我弗悟也遂築長壘內伏甲士而外為壕開
東門以待之夜令士卒浚壕益深廣璫不知也明日果
擁飛橋來攻未及岸軍陷壕中得跨壕而上者突入壘

門遇伏皆死降兩賊將柔聞之曰真吾子也璫既誅朝廷懲璫盡專兵民之權故能為亂議罷大藩子弟之在官者弘範例罷至元元年弘略既入宿衛帝召見意其兄弟有可代守順天者且念弘範有濟南之功授順天路管民總管佩金虎符二年移守大名歲大水漂沒廬舍租稅無從出弘範輒免之朝廷罪其專擅弘範請入見進曰臣以為朝廷儲小倉不若儲之大倉帝曰何說也對曰今歲水潦不收而必責民輸倉庫雖實而民死

亡殆盡明年租將安出曷若活其民使不致逃亡則歲有恒收非陛下大倉庫乎帝曰知體其勿問六年括諸道兵圍宋襄陽授益都淄萊等路行軍萬戶復佩金虎符朝廷以益都兵乃李壇所教練之卒勇悍難制故命領之戍鹿門堡以斷宋餉道且絕郢之救兵弘範建言曰國家取襄陽為延久之計者所以重人命而欲其自斃也曩者夏貴乘江漲送衣糧入城我師坐視無禦之者而其境南接江陵歸峽商販行旅士卒絡繹不絕寧

有自斃之時乎宜城萬山以斷其西柵灌子灘以絕其東則庶幾速斃之道也帥府奏用其言移弘範兵千人戍萬山既城與將士較射出東門宋師奄至將佐皆謂衆寡不敵宜入城自守弘範曰吾與諸君在此何事敵至將不戰乎敢言退者死即擐甲上馬立遣偏將李庭當其前他將攻其後親率二百騎為長陣令曰聞吾鼓則進未鼓勿動宋軍步騎相間突陣弘範軍不動再進再却弘範曰彼氣衰矣鼓之前後奮擊宋師奔潰八年

築一字城逼襄陽破樊城外郭九年攻樊城流矢中其肘裏瘡見主帥曰襄樊相為唇齒故不可破若截江道斷其援兵水陸夾攻樊必破矣樊破則襄陽何所恃從之明日復出銳卒先登遂拔之襄陽既下偕宋將呂文煥入覲賜錦衣白金寶鞍將校行賞有差十一年丞相巴延伐宋弘範率左部諸軍循漢江東略郢而南攻武磯堡取之北兵渡江弘範為前鋒宋相賈似道督兵阻蕪湖殿帥孫虎臣據丁家洲弘範轉戰而前諸軍繼之

宋師潰弘範長驅至建康十二年五月帝遣使諭丞相
毋輕敵貪進方暑其少駐以待弘範進曰聖恩待士卒
誠厚然緩急之宜非可遙度今敵已奪氣正當乘破竹
之勢取之無遺策矣豈宜迂緩使敵得為計耶丞相然
之馳驛至闕面論形勢得旨進師遂移軍次瓜洲分兵
立柵據其要害揚州都統姜才所統兵勁悍善戰至是
以二萬人出揚子橋弘範佐都元帥阿珠禦之與宋兵
夾水陣弘範以十三騎徑度衝之陣堅不動弘範引却

一騎躍馬揮刀直趣弘範弘範旋轡反迎刺之應手頓斃馬下其衆潰亂追至城門斬首萬餘級自相蹂藉溺死者過半宋將張世傑孫虎臣等率水軍於焦山決戰弘範以一軍從旁橫衝之宋師遂敗追至圖山之東奪戰艦八十艘俘馘千數上其功改亳州萬戶後賜名巴圖從中書左丞董文炳由海道會丞相已延進次近郊宋主上降表以伯姪為稱往返未決弘範將命入城數其大臣之罪皆屈服竟取稱臣降表來上十三年台州

叛討平之誅其為首者而已十四年師還授鎮國上將軍江東道宣慰使十五年宋張世傑立廣王昺於海上閩廣響應俾弘範往平之授蒙古漢軍都元帥陞辭奏曰漢人無統蒙古軍者乞以蒙古信臣為首帥帝曰汝知而父與察罕之事乎其破安豐也汝父欲留兵守之察罕不從師既南安豐復為宋有進退幾失據汝父深悔恨良由委任不專故也豈可使汝復有汝父之悔乎今付汝大事能以汝父之心為心則予汝嘉面賜錦衣

王帶弘範不受以劍甲為請帝出武庫劍甲聽其自擇
且諭之曰劍汝之副也不用令者以此處之將行薦李
恒為已貳從之至揚州選將校水陸二萬分道南征以
弟弘正為先鋒戒之曰選汝驍勇非私汝也軍法重我
不敢以私撓公勉之弘正所向克捷進攻三江寨寨據
隘乘高不可近因連兵向之寨中持滿以待弘範下令
下馬治朝食若將持久者持滿者疑不敢動而他寨不
虞也忽麾軍連拔數寨迴擣三江盡拔之至漳州軍其

東門命別將攻南門西門乃乘虛破其北門拔之攻鮑
浦寨又拔之由是瀕海郡邑皆望風降附獲宋丞相文
天祥于五坡嶺使之拜不屈弘範義之待以賓禮送至
京師獲宋禮部侍郎鄧光薦命子珪師事之十六年正
月庚戌由潮陽港發舶入海至甲子門獲宋斥候將劉
青顧凱乃知廣王所在辛酉次崖山宋軍千餘艘碇海
中建樓櫓其上隱然堅壁也弘範引舟師赴之崖山東
西對峙其北水淺舟膠非潮來不可進乃由山之東轉

南入大洋始得逼其舟又出奇兵斷其汲路燒其宮室
世傑有甥在弘範軍中三使招之世傑不從甲戌李恒
自廣州至授以戰艦二使守北面二月癸未將戰或請
先用砲弘範曰火起則舟散不如戰也明日四分其軍
軍其東南北三面弘範自將一軍相去里餘下令曰宋
舟潮至必東遁急攻之勿令得去聞吾樂作乃戰違令
者斬先麾北面一軍乘潮而戰不克李恒等順潮而退
樂作宋將以為且宴少懈弘範舟師犯其前衆繼之豫

構戰樓於舟尾以布幙障之命將士負盾而伏令之曰
聞金聲起戰先金而妄動者死飛矢集如蝟伏盾者不
動舟將接鳴金撤障弓弩火石交作頃刻并破七舟宋
師大潰宋臣抱其主昂赴水死獲其符璽印章世傑先
遁李恒追至大洋不及世傑走交趾風壞舟死海陵港
其餘將吏皆降嶺海悉平磨崖山之陽勒石紀功而還
十月入朝賜宴內殿慰勞甚厚未幾瘴癘疾作帝命尚
醫診視遣近臣臨議用藥勅衛士監門止雜人毋擾其

病病甚沐浴易衣冠扶掖至中庭面闕再拜退坐命酒作樂與親故言別出所賜劍甲命付嗣子珪曰汝父以是立功汝佩服勿忘也語竟端坐而卒年四十三贈銀青榮祿大夫平章政事諡武烈至大四年加贈推忠効節翊運功臣太師開府儀同三司上柱國齊國公改諡忠武延祐六年加保大功臣加封淮陽王諡獻武子珪自有傳

元史卷一百五十六

元史卷一百五十六考證

董文炳傳已未秋世祖伐宋至淮西臺山寨命文炳往
取之案世祖本紀八月甲午命廉希憲招臺山寨
比至千戶董文炳已破之與此異

九月師次陽羅堡案元明善董氏家傳作羊羅汰

欽定四庫全書





總校官編修臣吳紹濬